

## KERATAN AKHBAR

TARIKH : 26 MEI 2023  
AKHBAR : BERITA HARIAN  
MUKA SURAT : 26

### **Ekonomi dijangka perlahan beberapa bulan akan datang**

## **Ekonomi dijangka perlahan beberapa bulan akan datang**

**Ekonomi** Malaysia dijangka bertumbuh dengan kadar perlahan beberapa bulan ke hadapan berdasarkan Indeks Pelopor (IP) yang menyusut 1.2 peratus kepada 110.1 mata pada Mac 2023.

IP adalah alat diguna untuk menjangkakan kenaikan dan penurunan ekonomi dalam purata empat hingga enam bulan ke hadapan.

Jabatan Perangkaan Malaysia (DOSM) dalam satu kenyataan

berkata, prestasi IP terjejas disebabkan penurunan ketara dalam import benar semikonduktor dan indeks perusahaan Bursa Malaysia.

Ia berkata, perubahan bulanan IP juga mencatatkan penurunan 1.1 peratus pada Mac lalu berbanding 2.9 peratus pada bulan sebelumnya disebabkan jangkaan nilai jualan, pembuatan (0.6 peratus) dan import benar logam asas berharga dan logam bukan

ferus lain (0.5 peratus).

"Melihat arah aliran jangka panjang terlicin pada Mac 2023, IP mencatatkan 99.3 mata berbanding 99.2 mata pada Februari 2023.

"Meskipun masih di bawah trend 100.0 mata, ekonomi dijang-

ka berkembang sederhana dalam tempoh terdekat.

"Jangkaan ini mengambil kira cabaran global dan ketidaktentuan domestik," katanya menerusi penerbitan *Penunjuk Ekonomi Malaysia: Indeks Pelopor, Serentak & Susulan Bagi Februari 2023*.

Sementara itu, DOSM berkata, Indeks Serentak (IS) yang mencerminkan keadaan ekonomi semasa meningkat 3.4 peratus

kepada 121.9 mata pada Mac 2023, berbanding 117.9 mata pada bulan sama tahun lalu.

Jabatan itu berkata, peningkatan ini disumbangkan oleh semua komponen kecuali kapasiti penggunaan dan pembuatan.

"Pada masa sama, perubahan bulanan IS juga mencatatkan peningkatan 0.2 peratus disokong terutama oleh indeks kuantiti perdagangan runcit (0.3 peratus)," katanya.

